

四庫全書

史部

欽定四庫全書

周書卷四十八

唐 令 狐 德 棻 等 撰

列傳第四十

蕭詧

子歸 歸子琮 詧長子 第五子巖

第六子岌

第八子岑

歸第三子猷

蔡

大寶 大寶弟大業 王操 魏益德 尹

正 薛暉 許孝敬 甄元成 劉盈 岑

善方 傳淮 宗如周 蕭欣 柳洋 徐

岳 王浹 范迪 沈君游 袁敞

蕭詧字理孫蘭陵人也梁武帝之孫昭明太子統之第

三子幼而好學善屬文尤長佛義特為梁武帝所嘉賞
梁普通六年封曲江縣公中大通三年進封岳陽郡王
歷官宣惠將軍知石頭戍事琅邪彭城二郡太守東揚
州刺史初昭明卒梁武帝舍譽兄弟而立簡文內常愧
之寵亞諸子以會稽人物殷阜一都之會故有此授以
慰其心譽既以其昆弟不得為嗣常懷不平又以梁武
帝衰老朝多秕政有敗亡之漸遂蓄聚貨財交通賓客
招募輕俠折節下之其勇敢者多歸附左右遂至數千

人皆厚加資給中大同元年除持節都督雍梁東益南
北秦五州郢州之竟陵司州之隨郡諸軍事西中郎將
領寧蠻校尉雍州刺史嘗以襄陽形勝之地又是梁武
創基之所時平足以樹根本世亂可以圖霸功遂克已
勵節樹恩於百姓務修刑政志存綏養乃下教曰昔之
善為政者不獨師所見藉聽衆賢則所聞自遠資鑒外
物故在矚致明是以龐參卹民蓋訪言於高逸馬援居
政每責成於掾史王沉爰加厚賞呂虔功有所由故能

顯美政於當年流芳塵於後代吾以陋識來牧盛藩每
慮德不被民政道或紊中宵拊枕對案忘饑思納良謨
以匡弗逮雍州部內有不便於民不利於政長吏貪殘
戍將悞弱關市恣其哀刻豪猾多所苞藏並密以名聞
當加釐正若刺史治道之要弛張未允循酷乖理任用
違才或愛狎邪佞或斥廢忠謇彌思啓告用祛未悟鹽
梅舟楫允屬良規苦口藥石想勿余隱并廣示鄉閭知
其款意於是境內稱治太清二年梁武帝以譽兄河東

王譽為湘州刺史徙湘州刺史張纘為雍州以代譽纘恃其才望志氣矜驕輕譽少年州府迎侯有闕譽深銜之及至鎮遂託疾不與纘相見後聞侯景作亂頗凌蹙纘纘懼為所擒乃輕舟夜遁將之雍部復慮譽拒之梁元帝時鎮江陵與纘有舊纘將因之以斃譽兄弟會梁元帝與譽及信州刺史桂陽王曄各率所領入援金陵曄下峽至江津譽次江口梁元帝屈郢州之武成屬侯景已請和梁武帝詔罷援軍譽自江口將旋湘鎮曄欲

俟梁元帝至謁督府方還州纘時在江陵乃貽梁元帝書曰河東載櫓上水欲襲江陵岳陽在雍共謀不逞江陵遊軍主朱榮又遣使報云桂陽住此欲應譽譽梁元帝信之乃鑿船沉米斬纜而歸至江陵收慄殺之令其子方等王僧辯等相繼攻譽於湘州譽又告急於譽譽聞之大怒初梁元帝將援建業令所督諸州並發兵下赴國難譽遣府司馬劉方貴領兵為前軍出漢口及將發元帝又使詔議參軍劉穀喻譽令自行譽辭頗不順

元帝又怒而方貴先與謦不協潛與元帝相知尅期襲謦未及發會謦以他事召方貴方貴疑謀泄遂據樊城拒命謦遣使魏益德杜岸等衆軍攻之方貴窘急令其子遷超乞師於江陵元帝乃厚資遣續若將述職而密援方貴續次大隄樊城已陷謦擒方貴兄弟及黨與並斬之續因進至州謦遷延不受代乃以西城居之待之以禮軍民之政猶歸於謦謦以構其兄弟事始於續將密圖之續懼請元帝召之元帝乃徵續於謦謦留不遣

杜岸兄弟紹纘曰民觀岳陽殿下勢不仰容不如且往
西山以避此禍使君既得物情遠近必當歸集以此義
舉事無不濟纘深以為然因與岸等結盟誓纘又要雍
州人席引等於西山聚衆纘乃服婦人衣乘青布輦與
親信十餘人出奔引等與杜岸馳告營營令中兵參軍
尹正共岸等率兵追討並擒之纘懼不免因請為沙門
營時以譽危急乃留諮議參軍蔡大寶守襄陽率衆二
萬騎千匹伐江陵以救之于時江陵立柵周遠郭邑而

北面未就。詔因攻之。元帝大懼，乃遣參軍庾奩謂詔曰：「正德肆亂，天下崩離。汝復效尤，將欲何謂？吾蒙先帝愛顧，以汝兄弟見屬。今以姪伐叔，逆順安在？」詔謂奩曰：「家兄無罪，累被攻圍，同氣之情，豈可坐觀成敗？」七父若顧先恩，豈應若是？如能退兵，湘水吾便旋旆。襄陽詔既攻，柵不尅退，而築城又盡，銳攻之會，大雨暴至，平地水四尺。詔軍中霑漬，衆頗離心。其將杜岸、弟幼安及其兄子龕懼，詔不振，以其屬降於江陵。詔衆大駭，其夜遁歸。

襄陽器械輜重多沒於澧水初荅囚張纘於軍至是先
殺纘而後退焉杜岸之降也請以五百騎襲襄陽去城
三十里城中覺之蔡大寶乃輔荅母保林龔氏登陴閉
門拒戰會荅夜至龔氏不知其敗謂為賊也至曉見荅
乃納之岸等以荅至遂奔其兄猷於廣平荅遣將尹正
薛暉等攻拔之獲猷岸等并其母妻子女並於襄陽北
門殺之盡誅諸杜宗族親者其幼稚疎屬下蠶室又發
掘其墳墓燒其骸骨灰而揚之荅既與江陵構隙恐不

能自固大統十五年乃遣使稱藩請為附庸太祖令丞相府東閣祭酒榮權使焉謦大悅是歲梁元帝令柳仲禮率衆進圖襄陽謦懼乃遣其妻王氏及世子燾為質以請救太祖又令榮權報命仍遣開府楊忠率兵援之十六年楊忠擒仲禮平漢東謦乃獲安時朝議欲令謦發喪嗣位謦以未有璽命辭不敢當榮權時在謦所乃馳還具言其狀太祖遂令假散騎常侍鄭穆及榮權持節策命謦為梁王謦乃於襄陽置百官承制封拜十七

年謦留蔡大寶居守乃自襄陽來朝太祖謂謦曰王之來此頗由榮權王欲見之乎謦曰幸甚太祖乃召權與謦相見仍謂之曰榮權吉士也寡人與之從事未嘗見其失信謦曰榮常侍通二國之言無私故謦今者得歸誠魏闕耳魏恭帝元年太祖令柱國于謹伐江陵謦以兵會之及江陵平太祖立謦為梁主居江陵東城資以江陵一州之地其襄陽所統盡歸於我謦乃稱皇帝於其國年號大定追尊其父統為昭明皇帝廟號高宗統

妃蔡氏為昭德皇后又尊其所生母龔氏為皇太后立妻王氏為皇后子歸為皇太子其慶賞刑威官方制度並同王者惟上䟽則稱臣奉朝廷正朔至於爵命其下亦依梁氏之舊其戎章勲級則又兼用柱國等官又追贈叔父邵陵王綸太宰諡曰壯武贈兄河東王譽丞相諡曰武桓太祖乃置江陵防主統兵居於西城名曰助防外示助警備禦內實兼防警也初江陵滅梁元帝將王琳據湘州志圖匡復及警立琳乃遣其將潘純陀侯

方兒來寇，詔出師禦之。純、陟等退歸。夏，口詔之。四年，詔遣其大將軍王操率兵畧取王琳之長沙、武陵、南平等郡。五年，王琳又遣其將雷又柔襲陷監利郡。太守蔡大有死之。尋而琳與陳人相持，稱藩乞師於詔。詔許之。師未出而琳軍敗，附於齊。是歲，其太子歸來朝。京師詔之。六年，夏，震其前殿崩，壓殺二百餘人。初，江陵平，詔將尹德毅說詔曰：「臣聞人主之行與匹夫不同，匹夫者飾小行，競小廉，以取名譽。人主者定天下安社稷，以成大功。」

今魏虜貪憚罔顧弔民伐罪之義必欲肆其殘忍多所
誅夷俘囚士庶並為軍實然此等戚屬咸在江東念其
充餌豺狼見拘異域痛心疾首何日能忘殿下清宇
宙紹茲鴻緒悠悠之人不可門到戶說其塗炭至此咸
謂殿下為之殿下既殺人父兄孤人子弟人盡讐也誰
與為國但魏之精銳盡萃於此犒師之禮非無故事若
殿下為設享會因請于謹等為歡彼無我虞當相率而
至預伏武士因而斃之分命果殺掩其營壘斬馘逋醜

俾無遺噍江陵百姓撫而安之文武官寮隨即銓授既荷更生之惠孰不忻戴聖明魏人懾息未敢送死王僧辯之徒折簡可致然後朝服濟江入踐皇極纘堯復禹萬世一時晷刻之間大功可立古人云天與不取反受其咎時至不行反受其殃願殿下恢弘遠畧勿懷匹夫之行誓不從謂德毅曰卿之此策非不善也然魏人待我甚厚未可背德若遽為卿計則鄧祁侯所謂人將不食吾餘也既而闔城長幼被虜入關又失襄陽之地誓

乃追悔曰恨不用尹德毅之言以至於又是見邑居殘
毀干戈日用恥其威畧不振常懷憂憤乃著愍時賦以
見意其詞曰嗟余命之舛薄實賦運之逢屯既殷憂而
彌歲復坎壈以相隣晝營營而至晚夜耿耿而通晨望
否極而云泰何杳杳而無津悲晉璽之遷趙痛漢鼎之
移新無田范之明畧愧夷齊之得仁遂胡顏而苟免謂
小屈而或申豈妖沴之無已何國步之長淪恨少生而
輕弱本無志於爪牙謝兩章之雄勇慙二東之英華豈

三石於杜鄴異五馬於琅邪直受性而好善類蓬生之
在麻冀無咎而霑慶將保靜而蠲邪何昊穹之弗惠值
上帝之紆奢神州鞠為茂草赤縣遠於長蛇徒仰天而
太息空撫襟而咨嗟惟古人之有懷尚或感於知己况
託萼於霄極寵渥流於無已或小善而必褒時片言而
見美昔待罪於禹川歷三考而無紀獲免戾於明時遂
超隆於宗子始解印於稽山即驅傳於湘水彼南陽之
舊國實天漢之嘉祉既川岳之形勝復龍躍之基趾此

首賞之謬及謂維城之足恃值諸侯之攜貳遂留滯於樊川等勾踐之絕望同重耳之終焉望南枝而灑泣或東顧而潺湲歸歎之情何極首丘之思邈然忽值魏師入討于彼南荆既車徒之赭赫遂一鼓而陵城同寤生之舍許等小白之全邢伊社稷之不泯實有感於恩靈矧吾人之固陋迥飄薄於流萍忽沉滯於茲土復晷月而無成昔方千而畿甸今七里而磐縈寡田邑而可賦闕丘井而求兵無河內之資待同滎陽之未平夜騷騷

而擊柝晝子子而揚旌烽凌雲而迥照馬伏櫪而悲鳴
既有懷於斯日亦焉得而云寧彼雲夢之舊都乃標奇
於昔者驗徃記而瞻今何名高而實寡寂寥井邑荒涼
原野徒揄揚於宋玉空稱嗟於司馬南方卑而歎屈長
沙濕而悲賈余家國之一匡庶興周而祀夏忽縈憂而
北屈豈年華之大假加以狗盜鼠竊蜂蠆狐狸羣圍隸
而為寇聚臧獲而成師窺覲津渚跋扈江眉屢征肇於
殷歲頻戰起於軒時有扈興於夏典採芑著於周詩方

叔振於蠻貊伯禽捷於淮夷在逋穢其能幾會斬馘而
塞旗彼積惡之必稔豈天靈之我欺交川路之云擁理
惆悵而未怡謦在位八載年四十四保定二年二月薨
其羣臣等葬之於平陵諡曰宣皇帝廟號中宗謦少有
大志不拘小節雖多猜忌而知人善任使撫將士有恩
能得其死力性不飲酒安於儉素事其母以孝聞又不
好聲色尤惡見婦人雖相去數步遙聞其臭經御婦人
之衣不復更着又惡見人髮白事者必方便以避之其

在東揚州頗放誕省覽簿領好為戲論之言以此獲譏於世篤好文義所著文集十五卷內典華嚴般若法華金光明義疏四十六卷並行於世謗疆土既狹居常怏怏每誦老馬伏櫪志在千里烈士暮年壯心不已未嘗不盱衡扼腕歎咤者久之遂以憂憤發背而殂高祖又命其太子歸嗣位年號天保

歸字仁遠謗之第三子也機辯有文學善於撫御能得其下歡心嗣位之元年尊其祖母龔太后曰太皇太后

嫡母王皇后曰皇太后所生曹貴嬪曰皇太妃其年五月其太皇太后薨諡曰元太后九月其太妃又薨諡曰孝皇太妃二年皇太后薨諡曰宣靜皇后五年陳湘州刺史華皎巴州刺史戴僧朔並來附皎送其子玄響為質於歸仍請兵伐陳歸上言其狀高祖詔衛公直督荊州總管權景宣大將軍元定等赴之歸亦遣其柱國王操率水軍二萬會皎於巴陵既而與陳將吳明徹等戰於沌口直軍不利元定遂沒歸大將軍李廣等亦為陳

人所虜長沙巴陵並陷於陳衛公直乃歸罪於歸之柱
國殷亮歸雖以退敗不獨在亮然不敢違命遂誅之吳
明徹乘勝攻剋歸河東郡獲其守將許孝敬明年明徹
進寇江陵引江水灌城歸出頓紀南以避其銳江陵副
總管高琳與其尚書僕射王操拒守歸馬軍主馬武吉
徹等擊明徹敗之明徹退保公安歸乃還江陵歸之八
年陳又遣其司空章昭達來寇江陵總管陸騰及歸之
將士擊走之昭達又寇章陵之青泥歸令其大將軍許

世武赴援大為昭達所破初華皎戴僧朔從衛公直與
陳人戰敗率其麾下數百人歸於歸歸以皎為司空封
江夏郡公以僧朔為車騎將軍封吳興縣侯歸之十年
皎來朝至襄陽請衛公直曰梁主既失江南諸郡民少
國貧朝廷興亡繼絕理宜資贍豈使齊桓楚莊獨擅救
衛復陳之美望借數州以裨梁國直然之乃遣使言狀
高祖高祖許之詔以基平郡三州歸之於歸及高祖平
齊歸朝於鄴高祖雖以禮接之然未之重也歸知之後

因宴承間乃陳其父荷太祖拯救之恩并敘二國艱虞唇齒犄角之事詞理辯暢因涕泗交流高祖亦為之歔歔自是大加賞異禮遇日隆後高祖復與之宴齊氏故臣吒列長又亦預焉高祖指謂歸曰是登陴罵朕者也歸曰長又未能輔祭飏敢吠堯高祖大笑及酒酣高祖又命琵琶自彈之仍謂歸曰當為梁主盡歡歸乃起請舞高祖曰梁主乃能為朕舞乎歸曰陛下既親撫五絃臣何敢不同百獸高祖大悅賜雜繒萬段良馬數十匹

并賜齊後主妓妾及常所乘五百里駿馬以遺之及隋文帝執政尉遲迥王謙司馬消難等各起兵時歸將帥皆密請興師與迥等為連衡之勢進可以盡節於周氏退可以席卷山南歸固以為不可俄而消難奔陳迥等相次破滅隋文帝既踐極恩禮彌厚遣使賜金三百兩銀一千兩布帛萬段馬五百匹開皇二年隋文帝備禮納歸女為晉王妃又欲以其子瑒尚蘭陵公主由是罷江陵總管歸專制其國四年歸來朝長安隋文帝甚敬

待之詔歸位在王公之上賜縑萬匹珍玩稱是及還親
執其手謂之曰梁主久滯荆楚未復舊都故鄉之念良
軫懷抱朕當振旅長江相送旋反耳歸在位二十三載
年四十四五年五月薨其羣臣葬之於顯陵謚曰孝文
皇帝廟號世宗歸孝悌慈仁有君人之量四時祭享未
嘗不悲慕流涕性尤儉約御下有方境內稱治所著文
集及孝經周易義記及大小乘幽微並行於世隋文帝
又命其太子蕭琮嗣位年號廣運

琮字溫文性倜儻不羈博學有文義兼善弓馬初封東陽王尋立為皇太子及嗣位隋文帝徵琮叔父岑入朝因留不遣復置江陵總管以監之琮之二年隋文帝又徵琮入朝琮率其臣下二百餘人朝於長安隋文帝仍遣武鄉公崔弘度將兵戍江陵軍至郡州琮叔父巖及弟巖等懼弘度掩襲之遂虜居民奔於陳隋文帝於是廢梁國曲赦江陵死罪給民復十年梁二主各給守墓十戶尋拜琮為柱國封莒國公自訖初即位歲在乙亥

至是歲在丁未凡三十有三歲矣。詔子蔡追諡孝惠太
子巖封安平王。友東平王岑河間王。後改封吳郡王。歸
子璵義興王。瑒晉陵王。璟臨海王。珣南海王。瑒義安王。
瑀新安王。詔之在藩及居帝位以蔡大寶為股肱。王操
為腹心。魏益德尹正。薛暉許孝敬。薛宣為爪牙。甄玄成
劉盈岑善方傳准褚珪蔡大業典衆務。張綰以舊齒處
顯位。沈重以儒學蒙厚禮。自餘多所獎拔。咸盡其器能。
及歸纂業。親賢並用。將相則華皎殷亮劉忠義宗室則

蕭欣蕭翼民望則蕭確謝溫柳洋王湜徐岳外戚則王
凝王誦殷璉文章則劉孝勝范迪沈君游君公柳信言
政事則袁敞柳莊蔡延壽甄詡皇甫茲故能保其疆土
而和其民人焉今載譽子寮等及蔡大寶以下尤著者
附於左其在梁陳隋已有傳及歸諸子未任職者則不
兼錄

寮字道遠譽之長子也母曰宣靜皇后幼聰敏有成人
之量譽之為梁主立為世子尋病卒及譽稱帝追諡焉

巖字義遠，謇第五子也。性仁厚，善於撫接。歷侍中、荊州刺史、尚書令、太尉、太傅。入陳，授平東將軍、東揚州刺史。及陳亡，百姓推巖為主，以禦隋師。為總管宇文述所破，伏法於長安。

岌，謇第六子也。性淳和，幼而好學。位至侍中、中衛將軍。岌之五年卒，贈侍中、司空，諡曰孝。

岑，字智遠，謇第八子也。位至太尉，性簡貴，御下嚴整。及琮嗣位，自以望重，屬尊，頗有不法。故隋文徵入朝，拜大

將軍封懷義郡公

璵字欽文歸第三子也幼有令譽能屬文特為歸所愛位至荊州刺史初隋師至荊州梁之百寮咸恐懼計無所出唯璵建議南奔入陳授侍中安東將軍吳州刺史及陳亡吳人推為主以禦隋師戰而敗與巖同時伏法蔡大寶字敬位濟陽考城人祖履齊尚書祠部郎父點梁尚書儀曹郎南兗州別駕大寶少孤而篤學不倦善屬文初以明經對策第一解褐武陵王國左常侍嘗以

書于僕射徐勉大為勉所賞異乃令與其子遊處所有
墳籍盡以給之遂博覽羣書學無不綜謦初出第勉仍
薦大寶為侍讀兼掌記室尋除尚書儀曹郎出鎮會稽
大寶為記室領長流謦蒞襄陽遷謦議參軍及梁元帝
與河東王譽結隙謦令大寶使江陵以觀之梁元帝素
知大寶見之甚悅乃示所制玄覽賦令注解焉三日而
畢元帝大嗟賞之贈遺甚厚大寶還白謦云湘東必有
異圖禍亂將作不可下援臺城謦納之及為梁主除中

書侍郎兼吏部掌大選事領襄陽太守遷員外散騎常侍吏部郎俄轉吏部尚書軍國之事咸委決焉加授大將軍遷尚書僕射進號輔國將軍又除使持節宣惠將軍雍州刺史謦於江陵稱帝徵為侍中尚書令參掌選事又加雲麾將軍荊州刺史進位柱國軍師將軍領太子少傅轉安前將軍封安豐縣侯邑一千戶從歸入朝領太子少傅歸嗣位冊授司空中書監中權大將軍領吏部尚書固讓司空許之加特進歸之三年卒歸哭之

慟自卒及葬三臨其喪贈司徒進爵為公諡曰文凱配
食謚廟大寶性嚴整有智謀雅達政事文詞膽速謚之
章表書記教令詔冊並大寶專掌之謚推心委任以為
謀主時人以謚之有大寶猶劉先主之有孔明焉所著
文集三十卷及尚書義疏並行於世有四子次子延壽
有器識博涉經籍尤善當世之務尚謚女宣成公主歷
中書郎尚書右丞吏部郎御史中丞從琮入隋授開府
儀同三司祕書丞終於成州刺史大寶弟大業

大業字敬道有至行父沒居喪過禮性寬恕學涉經史
有將命材屢充使詣闕初以西中郎府參軍隨訥之鎮
訥稱帝歷尚書左丞開遠將軍監利郡守散騎常侍衛
尉卿歸嗣位遷都官尚書除貞毅將軍漳川太守入為
左民尚書太常卿歸之七年卒贈金紫光祿大夫諡曰
簡有五子允恭最知名起家著作佐郎太子舍人梁滅
入陳拜尚書庫部郎陳亡入隋授起居舍人

王操字子高其先太原晉陽人也訥母龔氏之外弟也

祖靈慶海鹽令父景休臨川內史操性敦厚有籌畧博涉經史在公恪勤初為營外兵參軍親任亞於蔡大寶營承制除尚書左丞及稱帝遷五兵尚書大將軍郢州刺史尋進位柱國封新康縣侯歸嗣位授鎮右將軍尚書僕射及吳明徹為寇歸出頓紀南操撫循將士莫不用命明徹既退江陵獲全操之力也遷侍中中衛將軍尚書令開府儀同三司參掌選事領荊州刺史操既位居朝右每自挹損深得當時之譽歸之十四年卒歸舉

哀於朝堂流涕謂其羣臣曰天不使吾平蕩江表何奪
吾賢相之速也及葬親祖於瓦官門贈司空進爵為公
諡曰康節有七子次子衡最知名有才學起家祕書郎
歷太子洗馬中書黃門侍郎

魏益德襄陽人也有才幹膽勇過人數從軍征討以功
累遷至郡守登蒞襄陽以益德為其府司馬登承制拜
將軍尋加大將軍及登稱帝進位柱國封上黃縣侯邑
千戶加車騎將軍登之二年卒贈司空諡曰忠壯進爵

為公歸之五年以益德配食營廟

尹正其先天水人營莅雍州正為其府中兵參軍擒張
纘獲杜岸皆正之力營承制以為將軍尋拜大將軍及
稱帝除護軍將軍進位柱國封新野縣侯邑千戶營之
三年卒贈開府儀同三司諡曰剛歸之五年以正配食
營廟子德毅多權畧位至大將軍後以見疑賜死

薛暉河東人也有才畧身長八尺形貌甚偉嘗督禁旅
為營爪牙當禦侮之任與尹正攻獲杜岸於南陽營承

制拜將軍尋加大將軍進位柱國除領軍將軍歸之二
年卒贈開府儀同三司有六子子建子尚知名

許孝敬吳人小名洞兒勁勇過人為營驍將以大將軍
守河東既無救援為吳明徹所擒遂戮於建康市贈車
騎大將軍子世武嗣少襲父大將軍好勇不拘行檢重
賓客施與不節資產既盡鬱鬱不得志遂謀奔陳事覺
伏誅又有大將軍李廣會稽人早事營以敢勇聞沌口
之役先登力戰及華皎軍敗為吳明徹所擒將降之廣

辭色不屈遂被害贈太尉追封建興縣公諡曰忠武

甄玄成字敬平中山人博達經史善屬文少為簡文所知以錄事參軍隨荅鎮襄陽轉中記室參軍掌書記頗參政事以江陵甲兵殷盛遂懷貳心密書與梁元帝申其誠款遂有得其書者進之於荅荅深信佛法常願不殺誦法華經人玄成素誦法華經遂以此獲免荅後見之常曰甄公好得法華經力歷位中書侍郎御史中丞祠部尚書吏部尚書荅之六年卒贈侍中護軍將軍有

文集二十卷子誦少沈敏閑習政事歷中書舍人尚書右丞從琮入隋授開府儀同三司終於太府少卿

劉盈彭城人以西中郎府錄事參軍隨訥之鎮有器度勤於在公訥之軍國經謀頗得參預歷黃門郎中書監雍州刺史尚書僕射歸之七年卒贈本官第三子然于時頗知名隋鷹擊郎將

岑善方字思義南陽棘陽人漢征南大將軍彭之後也祖惠甫給事中父昶散騎侍郎善方有器局博綜經史

善於辭令以刑獄參軍隨登至襄陽登初請內附以善方兼記室充使詣闕應對閑敏深為太祖所嘉自此往來凡數十反魏恭帝二年授驃騎大將軍開府儀同三司封長寧縣公登之承制也授中書舍人遷襄陽郡守及稱帝徵為太府卿領中書舍人轉太府領舍人如故尋遷散騎常侍起部尚書善方性清慎有當世幹能故登委以機密登之七年卒贈太常卿諡曰敬所著文集十卷有七子並有操行之元之利之象最知名之元太

子舍人早卒高祖錄善方充使之功追之利之象入朝授之利帥都督代王記室參軍後仕隋歷安固令郴義江三州司馬零陵郡丞之象掌式中士隋文帝相府參軍事後仕隋歷尚書虞部員外郎邵陵上宜渭南邯鄲四縣令

傅准北地人祖照金紫光祿大夫父諡湘東王外兵參軍准有文才善詞賦以西中郎參軍隨營之鎮官至度支尚書歸之七年卒贈太常卿諡曰敬康所著文集二

十卷有二子曰秉曰執並材兼文史秉尚書右丞執中書舍人尚書左丞

宗如周南陽人有才學容止詳雅以府僚隨謦歷黃門散騎列卿後至度支尚書歸之九年卒如周面狹長以法華經云聞經隨喜面不狹長嘗戲之曰卿何為謗經如周蹶蹠自陳不謗謦又謂之如初如周懼出告蔡大寶大寶知其旨笑謂之曰君當不謗餘經政應不信法華耳如周乃悟又嘗有人訴事於如周謂為經作如州

官也乃曰某有屈滯故來訴如州官如周曰爾何小人
敢呼我名其人慙謝曰祇言如州官作如州不知如州
官名如周早知如州官名如周不敢喚如州官作如周
如周乃笑曰命卿自責見侮反深衆咸服其寬雅有七
子希顏希華知名希顏有文學仕至中書舍人希華博
通經術為荆楚儒宗

蕭欣梁武帝弟安成康王秀之孫煬王機之子也幼聰
警博綜墳籍善屬文登踐位以欣襲機封歷侍中中書

令尚書僕射尚書令歸之二十三年卒贈司空欣與柳
信言當歸之世俱為一時文宗有集三十卷又著梁史
百卷遭亂失本

柳洋河東解人祖悛尚書左僕射父昭中書侍郎洋少
有文學以禮度自拘與王湜俱以風範方正為當時所
重位至吏部尚書出為上黃郡守梁國廢以郡歸隋授
開府儀同三司尋卒

徐岳東海人尚書左僕射開府儀同三司簡肅公勉之

少子也少方正博通經史初為東陽王琮師琮為皇太子授詹事及嗣位除侍中左民尚書俄遷尚書僕射從琮入隋授上開府儀同三司終於陳州刺史子凱祕書郎岳兄矩有文學善吏事頗黷於貨賄位至度支尚書子敬鴻臚卿

王浞琅邪臨沂人祖琳侍中太府卿父錫侍中浞少有令譽尚譽妹廬陵長公主歷祕書郎太子舍人宣成王友廬陵內史譽踐位授侍中吏部尚書歸之四年使詣

闕卒於賓館贈侍中右光祿大夫子瓘有文詞黃門侍郎
浞弟湜方雅有器識位至都官尚書歸之二十年卒
子懷祕書郎隋沔陽令

范迪順陽人祖績尚書左丞父胥鄱陽內史迪少機辯
善屬文歷中書黃門侍郎尚書右丞散騎常侍歸之十
七年卒有文集十卷子裒迪弟適文采劣於迪而經術
過之位至中衛東平王長史

沈君游吳興人祖僧旻左民尚書父巡東陽太守君游

博學有詞采位至散騎常侍歸之十二年卒有文集十卷弟君公有幹局美風儀文章典正特為歸所重歷中書黃門侍郎御史中丞自都官尚書為義興王獄師從獄奔陳授侍中太子詹事隋平陳以獄同謀度江伏誅袁敞陳郡人祖昂司空父士俊安成內史敞少有器量博涉文史以吏部郎使詣闕時主者以敞班在陳使之後敞固不從命主者詰之敞對曰昔陳之祖父乃梁諸侯之下吏也棄忠與義盜有江東今大周朝宗萬國招

攜以禮若使梁之行人在陳人之後便恐彝倫失序豈使臣之所望焉主者不能屈遂以狀奏高祖善之乃詔敝與陳使異日而進還以稱旨遷侍中轉左民尚書從琮入隋授開府儀同三司終於譙州刺史子謚謙

史臣曰梁主任術好謀知賢養士蓋有英雄之志霸王之畧焉及淮海板蕩骨肉猜貳擁衆自固稱藩內歎終能據有全楚中興頽運雖土宇殊於舊邦而位號同於曩日貽厥自遠享國數世可不謂賢哉嗣子纂承舊業

增修遺構賞罰得衷舉厝有方密邇寇讐則威畧具舉
朝宗上國則聲猷遠振豈非繼世之令主乎

周書卷四十八

欽定四庫全書

周書卷四十九

唐 令 狐 德 榮 等 撰

列傳第四十一

異域上

高麗

百濟

蠻

獠

宕昌

鄧至

白蘭

氐

稽胡

庫莫奚

蓋天地之所覆載至大矣日月之所照臨至廣矣然則

萬物之內民人寡而禽獸多兩儀之間中土局而殊俗
曠求之鄒說詭怪之迹實繁考之山經竒譎之詞匪一
周孔存而不論是非紛而莫辯秦皇鞭笞天下黷武於
遐方漢武士馬彊盛肆志於遠畧匈奴既却其國已虛
犬馬既來其民亦困是知鴈海龍堆天所以絕夷夏也
炎方朔漠地所以限內外也况乎時非秦漢志甚羸劉
違天道以求其功殫民力而從所欲顛墜之釁固不旋
踵是以先王設教內諸夏而外夷狄往哲垂範美樹德

而鄙廣地雖禹迹之東漸西被不過海及流沙王制之
自北徂南裁稱穴居交趾豈非道貫三古義高百代者
乎有周承喪亂之後屬戰爭之日定四表以武功安三
邊以權道趙魏尚梗則結姻於北狄厩庫未實則通好
於西戎由是德刑具舉聲名遐洎卉服氈裘輻輳於屬
國商胡販客填委於旗亭雖東畧漏三吳之地南巡阻
百越之境而國威之所肅服風化之所覃被亦足為弘
矣其四夷來朝聘者今竝紀之於後至於道路遠近物

產風俗詳諸前史或有不同斯皆錄其當時所記以備遺闕云爾

高麗者其先出於夫餘自言始祖曰朱蒙河伯女感日影所孕也朱蒙長而有材畧夫餘人惡而逐之土于紇斗骨城自號曰高句麗仍以高為氏其孫莫來漸盛擊夫餘而臣之莫來裔孫璉始通使於後魏其地東至新羅西渡遼水二千里南接百濟北隣靺鞨千餘里治平壤城其城東西六里南臨湏水城內唯積倉儲器備寇

賊至日方入固守王則別為宅於其側不常居之其外有國內城及漢城亦別都也復有遼東玄菟等數十城皆置官司以相統攝大官有大對盧次有太大兄大兄小兄意俟奢烏拙太大使者大使者小使者褥奢翳屬仙人并褥薩凡十三等分掌内外事焉其大對盧則以彊弱相陵奪而自為之不由王之署置也其刑法謀反及叛者先以火焚爇然後斬首籍沒其家盜者十餘倍徵贓若貧不能備及負公私債者皆聽評其子女為奴

婢以償之丈夫衣同袖衫大口袴白韋帶黃革履其冠
曰骨蘇多以紫羅為之雜以金銀為飾其有官品者又
插二鳥羽於其上以顯異之婦人服裙襦裾袖皆為襪
書籍有五經三史三國志晉陽秋兵器有甲弩弓箭戟
稍矛鉞賦稅則絹布及粟隨其所有量貧富差等輸之
土田瘠薄居處節儉然尚容止多詐偽言辭鄙穢不簡
親疎乃至同川而浴共室而寢風俗好淫不以為愧有
遊女者夫無常人婚娶之禮畧無財幣若受財者謂之

賣婢俗甚恥之父母及夫喪其服制同於華夏兄弟則限以三月敬信佛法尤好淫祀又有神廟二所一曰夫餘神刻木作婦人之象一曰登高神云是其始祖夫餘神之子竝置官司遣人守護蓋河伯女與朱蒙云璉五世孫成大統十二年遣使獻其方物成死子湯立建德六年湯又遣使來貢高祖拜湯為上開府儀同大將軍遼東郡開國公遼東王

百濟者其先蓋馬韓之屬國夫餘之別種有仇台者始

國於帶方故其地界東極新羅北接高句麗西南俱限
大海東西四百五十里南北九百餘里治固麻城其外
更有五方中方曰古沙城東方曰得安城南方曰久知
下城西方曰刀先城北方曰熊津城王姓夫餘氏號於
羅瑕民呼為韃吉支夏言竝王也妻號於陸夏言妃也
官有十六品左平五人一品達率三十人二品恩率三
品德率四品扞率五品柰率六品六品已上冠飾銀華
將德七品紫帶施德八品皂帶固德九品赤帶李德十

品青帶對德十一品文督十二品皆黃帶武督十三品
佐軍十四品振武十五品克虞十六品皆白帶自恩率
以下官無常員各有部司分掌衆務內官有前內部穀
部肉部內掠部外掠部馬部刀部功德部藥部木部法
部後官部外官有司軍部司徒部司空部司寇部點口
部客部外舍部綢部日官部都市部都下有萬家分為
五部曰上部前部中部下部後部統兵五百人五方各
有方領一人以達率為之郡將三人以德率為之方統

兵一千二百人以下七百人以上城之内外民庶及餘
小城咸分隸焉其衣服男子畧同於高麗若朝拜祭祀
其冠兩廂加翅戎事則不拜謁之禮以兩手據地為敬
婦人衣以袍而袖微大在室者編髮盤於首後垂一道
為飾出嫁者乃分為兩道焉兵有弓箭刀稍俗重騎射
兼愛墳史其秀異者頗解屬文又解陰陽五行用宋元
嘉厯以建寅月為歲首亦解醫藥卜筮占相之術有投
壺樗蒲等雜戲然尤尚奕碁僧尼寺塔甚多而無道士

賦稅以布絹絲麻及米等量歲豐儉差等輸之其刑罰
反叛退軍及殺人者斬盜者流其贓兩倍徵之婦人犯
姦者没入夫家為婢婚娶之禮畧同華俗父母及夫死
者三年治服餘親則葬訖除之土田下濕氣候溫暖五
穀雜果菜蔬及酒醴餽饌藥品之屬多同於內地唯無
駝驢騾羊鵝鴨等其王以四仲之月祭天及五帝之神
又每歲四祠其始祖仇台之廟自晉宋齊梁據江左後
魏宅中原竝遣使稱藩兼受封拜齊氏擅東夏其王隆

亦通使焉隆死子昌立建德六年齊滅昌始遣使獻方物宣政元年又遣使來獻

蠻者盤瓠之後族類蕃衍散處江淮之間汝豫之郡憑險作梗世為寇亂逮魏人失馭其暴滋甚有冉氏向氏田氏者陬落尤盛餘則大者萬家小者千戶更相崇樹僭稱王侯屯據三峽斷遏水路荆蜀行人至有假道者太祖畧定伊瀍聲教南被諸蠻畏威靡然向風矣大統五年蔡陽蠻王魯超明內屬以為南雍州刺史仍世襲

馬十一年蠻首梅勒特來貢其方物尋而蠻帥田杜清
及沔漢諸蠻擾動大將軍楊忠擊破之其後蠻帥杜青
和自稱巴州刺史以州入附朝廷因其所稱而授之青
和後遂反攻圍東梁州其唐州蠻田魯嘉亦叛自號豫
州伯王雄權景宣等前後討平之語在泉仲遵及景宣
傳魏廢帝初蠻酋樊舍舉落內附以為淮北三州諸軍
事淮州刺史淮安郡公于謹等平江陵諸蠻騷動詔豆
盧寧蔡祐等討破之魏恭帝二年蠻酋宜民王田興彥

北荊州刺史梅季昌等相繼款附以興彥季昌竝為開
府儀同三司加季昌洛州刺史賜爵石臺縣公其後巴
西人譙淹扇動羣蠻以附於梁蠻帥向鎮侯向日彪等
應之向五子王又攻陷信州田烏度田都唐等抄斷江
路文子榮復據荊州之汶陽郡自稱仁州刺史并隣州
刺史蒲微亦舉兵逆命詔田弘賀若敦潘招李遷哲討
破之語在敦及遷哲陽雄等傳武成初文州蠻叛州選
軍討定之尋而冉令賢向五子王等又攻陷白帝殺開

府楊長華遂相率作亂前後遣開府元契趙剛等總兵出討雖頗剪其族類而元惡未除天和元年詔開府陸騰督王亮司馬裔等討之騰水陸俱進次于湯口先遣喻之而令賢方增浚城池嚴設扞禦遣其長子西黎次子南王領其支屬於江南險要之地置立十城遠結涪陽蠻為其聲援令賢率其精卒固守水邏城騰乃總集將帥謀其進趣咸欲先取水邏然後經畧江南騰言於衆曰令賢內恃水邏金湯之險外託涪陽輔車之援兼

復資糧克實器械精新以我懸軍攻其嚴壘脫一戰不
尅更成其氣不如頓軍湯口先取江南剪其羽毛然後
進軍水邏此制勝之計也衆皆然之乃遣開府王亮率
衆渡江旬日攻拔其八城凶黨奔散獲賊帥冉承公并
生口三千人降其部衆一千戶遂簡募驍勇數道入攻
水邏路經石壁城此城峻嶮四面壁立故以名焉唯有
一小路緣梯而上蠻蜚以為峭絕非兵衆所行騰被甲
先登衆軍繼進備經危阻累月乃得舊路且騰先任隆

州總管雅知蠻帥冉伯犁冉安西與令賢有隙騰乃招誘伯犁等結為父子又多遺其金帛伯犁等悅遂為鄉導水邏側又有石勝城者亦是險要令賢使兄子龍真據之騰又密誘龍真云若平水邏使其代令賢處龍真大悅密遣其子詣騰騰乃厚加禮接賜以金帛蠻貪利既深仍請立効乃謂騰曰欲翻所據城恐人力寡少騰許以三百兵助之既而遣二十人銜枚夜進龍真力不能禦遂平石勝城晨至水邏蠻衆大潰斬首萬餘級虜

獲一萬口令賢遁走追而獲之并其子弟等皆斬之司
馬裔又別下其二十餘城獲蠻帥冉三公等騰乃積其
骸骨於水邏城側為京觀後蠻望見輒大號哭自此
狼戾之心輟矣時向五子王據石默城令其子寶勝據
雙城水邏平後頻遣喻之而五子王猶不從命騰又遣
王亮屯牢坪司馬裔屯雙城以圖之騰慮雙城孤峭攻
未易拔賊若委城奔散又難追討乃令諸軍周回立柵
遏其走路賊乃大駭於是縱兵擊破之擒五子王於石

默獲寶勝於雙城悉斬諸向首領生擒萬餘口信州舊
治白帝騰更於劉備故宫城南八陣之北臨江岸築城
移置信州又以巫縣信陵秭歸竝是硤中要險於是築
城置防以為襟帶焉天和六年蠻渠冉祖喜冉龍驤又
反詔大將軍趙閭討平之自此羣蠻懾息不復為寇矣
獠者蓋南蠻之別種自漢中達于邛笮川洞之間在所
皆有之俗多不辨姓氏又無名字所生男女唯以長幼
次第呼之其丈夫稱阿暮阿段婦人阿夷阿第之類皆

其語之次第稱謂也喜則羣聚怒則相殺雖父子兄弟亦手刃之遞相掠賣不避親戚被賣者號叫不服逃竄避之乃將買人指撈捕逐若追亡叛獲便縛之但經被縛者即服為賤隸不敢更稱良矣俗畏鬼神尤尚淫祀巫祝至有賣其昆季妻孥盡者乃自賣以祭祀焉往往推一酋帥為王亦不能遠相統攝自江左及中州遞有巴蜀多恃險不賓太祖平梁益之後令所在撫慰其與華民雜居者亦頗從賦役然天性暴亂旋至擾動每歲

命隨近州鎮出兵討之獲其口以充賤隸謂之為壓獠
焉後有商旅往來者亦資以為貨公卿逮于民庶之家
有獠口者多矣魏恭帝三年陵州木籠獠反詔開府陸
騰討破之俘斬萬五千人保定二年鐵山獠又反抄斷
江路陸騰復攻拔其三城虜獲三千人降其種三萬落
語在騰傳天和三年梁州恒稜獠叛總管長史趙文表
討之軍次巴州文表欲率衆徑進軍吏等曰此獠旅拒
日久部衆甚彊討之者皆四面攻之以分其勢今若大

軍直進不遣奇兵恐併力於我未可制勝文表曰往者
既不能制之今須別為進趣若四面遣兵則獠降走路
絕理當相率以死拒戰如從一道則吾得示威恩分遣
使人以理曉諭為惡者討之歸善者撫之善惡既分易
為經畧事有變通奈何欲遵前轍也文表遂以此意遍
令軍中時有從軍熟獠多與恒稜親識即以實報之恒
稜獠相與聚議猶豫之間文表軍已至其界獠中先有
二路一路稍平一路路極險俄有生獠酋帥數人來見文

表曰我恐官軍不悉山川請為鄉導文表謂之曰此路寬平不須導引卿但先去好慰諭子弟也乃遣之文表謂其衆曰向者獠帥語吾從寬路而行必當設伏要我若從險路出其不虞獠衆自離散矣於是勒兵從險道進其有不通之處隨即治之乘高而望果見其伏兵獠既失計爭携妻子退保險要文表頓軍大蓬山下示以禍福遂相率來降文表皆慰撫之仍徵其稅租無敢動者後除文表為蓬州刺史又大得獠和建德初李暉為

梁州總管諸獠亦竝從附然其種類滋蔓保據巖壑依
林走險若履平地雖屢加兵弗可窮討性又無知殆同
禽獸諸夷之中最難以道義招懷者也

宕昌羗者其先蓋三苗之胤周時與庸蜀微盧等八國
從武王滅商漢有先零燒當等世為邊患其地東接中
華西通西域南北數千里姓別自為部落各立酋帥皆
有地分不相統攝宕昌即其一也俗皆土著居有棟宇
其屋織犛牛尾及毳羊毛覆之國無法令又無徃賦唯

征伐之時乃相屯聚不然則各事生業不相往來皆衣
裘褐牧養犂牛羊豕以供其食父子伯叔兄弟死者即
以其繼母世叔母及嫂姊妹等為妻俗無文字但候草
木榮落以記歲時三年一相聚殺牛羊以祭天有梁勒
者世為酋帥得羗豪心乃自稱王焉其界自仇池以西
東西千里帶水以南南北八百里地多山阜部衆二萬
餘落勒孫彌忽始通使於後魏太武因其所稱而授之
自彌忽至公定九世每修職貢不絕後見兩魏分隔遂

懷背誕永熙末公定乃引吐谷渾寇金城大統初又率其種人入寇詔行臺趙貴督儀同侯莫陳順等擊破之公定懼稱藩請罪太祖捨之拜撫軍將軍四年以公定為南洮州刺史要安蕃王後改洮州為岷州仍以公定為刺史是歲秦州濁水羗反州軍討平之七年公定又舉兵入寇獨孤信時鎮隴右詔信率衆便討之軍未至而公定為其下所殺信進兵破其餘黨朝廷方欲招懷殊俗乃更以其弟彌定為宕昌王十六年彌定宗人獠

甘襲奪其位彌定來奔先是羗酋傍乞鐵忽等因公定反叛之際遂擁衆據渠林川與渭州民鄭五醜扇動諸羗阻兵逆命至是詔大將軍宇文貴豆盧寧涼州刺史史寧等率兵討獠甘等竝擒斬之納彌定而還語在貴等傳其後羗酋東念姐鞏廉俱和等反大將軍豆盧寧王勇等前後討平之保定初彌定遣使獻方物三年又遣使獻生猛獸四年彌定寇洮州總管李賢擊走之是歲彌定又引吐谷渾寇石門戍賢復破之高祖怒詔大

將軍田弘討滅之以其地為宕州

鄧至羗者羗之別種也有像舒治者世為白水酋帥自稱王焉其地北與宕昌相接風俗物產亦與宕昌畧同自舒治至檐析十一世魏恭帝元年檐析失國來奔太祖令章武公導率兵送復之

白蘭者羗之別種也其地東北接吐谷渾西北至利模徙南界郿鄂風俗物產與宕昌畧同保定元年遣使獻犀甲鐵鎧

氏者西夷之別種三代之際蓋自有君長而世一朝見故詩稱自彼氐羗莫敢不來王也漢武帝滅之以其地為武都郡自汧渭抵於巴蜀種類實繁漢末有氐帥楊駒始據仇池百頃最為彊族其後漸盛乃自稱王至裔孫纂為符堅所滅堅敗其族人定又自稱王定為乞伏乾歸所殺定從弟盛代有其國世受魏氏封拜亦通使於江左然其種落分散叛服不恒隴漢之間屢被其害盛之苗裔曰集始魏封為武興王集始死子紹先立遂

僭稱大號魏將傅豎眼滅之執紹先歸諸京師以其地
為武興鎮魏氏洛京未定天下亂紹先奔還武興復自
立為王太祖定秦隴紹先稱藩送妻子為質大統元年
紹先請其妻女太祖奏魏帝還之紹先死子辟邪立四
年南岐州氐符安壽反攻陷武都自號太白王詔大都
督侯莫陳順與渭州刺史長孫澄討破之安壽以其衆
降九年清水氐苻李鼠仁據險作亂氐帥梁道顯叛攻
南由太祖遣典籤趙昶慰諭之鼠仁等相繼歸附語在

昶傳十一年於武興置東益州以辟邪為刺史十五年
安夷氏復叛趙昶時為郡守收其首逆者二十餘人斬
之餘衆乃定於是以昶行南秦州事氏帥蓋鬧等相率
作亂鬧據北谷其黨覃洛聚洮中楊興德符雙園平氏
城姜樊噲亂武階西結宕昌羗獠甘共推蓋鬧為主昶
分道遣使宣示禍福然後出兵討之擒蓋鬧散其餘黨
興州叛氏復侵逼南岐州刺史叱羅協遣使告急昶率
兵赴救又大破之先是氏首楊法深據陰平自稱亦盛

之苗裔也魏孝昌中舉衆內附自是職貢不絕廢帝元年以法深為黎州刺史二年楊辟邪據州反羣氏復與同逆詔叱羅協與趙昶討平之太祖乃以大將軍宇文貴為大都督六州諸軍事興州刺史貴威名先著羣氏頗畏服之是歲楊法深從尉遲迴平蜀軍回法深旋鎮尋與其宗人楊崇集楊陳性各擁其衆遞相攻討趙昶時督成武沙三州諸軍事成州刺史遣使和解之法深等從命乃分其部落更置州郡以處之魏恭帝末武興

氏反圍利州鳳州固道氏魏天王等亦聚衆響應大將軍豆盧寧等討平之世宗時興州人段吒及下辯栢樹二縣民反相率破蘭皇成氏酋姜多復率厨中氏蜀攻陷落叢郡以應之趙昶率衆討平二縣并斬段吒而陰平盧北二郡氏復往往屯聚與厨中相應昶乃簡擇精騎出其不意徑入厨中至大竹坪連破七柵誅其渠率二郡竝降及昶還厨中主氏復為寇掠昶又遣儀同劉崇義宇文琦率兵入厨中討之大破氏衆斬姜多及符

肆王等於是羣氏竝平及王謙舉兵沙州氏帥開府楊永安又據州應謙大將軍達奚儒討平之

稽胡一曰步落稽蓋匈奴別種劉元海五部之苗裔也或云山戎赤狄之後自離石以西安定以東方七八百里居山谷間種落繁熾其俗土著亦知種田地少桑蠶多麻布其丈夫衣服及死亡殯葬與中夏畧同婦人則多貫蜃貝以為耳及頸飾又與華民錯居其渠帥頗識文字然語類夷狄因譯乃通躡踞無禮貪而忍害俗好

淫穢處女尤甚將嫁之夕方與淫者叙離夫氏聞之以
多為貴既嫁之後頗亦防閑有犯姦者隨事懲罰又兄
弟死皆納其妻雖分統郡縣列於編戶然輕其徭賦有
異齊民山谷阻深者又未盡役屬而凶悍恃險數為寇
亂魏孝昌中有劉蠡升者居雲陽谷自稱天子立年號
署百官屬魏氏政亂力不能討蠡升遂分遣部衆抄掠
居民汾晉之間畧無寧歲齊神武遷鄴後始密圖之偽
許以女妻蠡升太子蠡升信之遂遣其子詣鄴齊神武

厚為之禮緩以婚期蚤升既恃和親不為之備大統元年三月齊神武潛師襲之蚤升率輕騎出外徵兵為其北部王所殺斬首送於齊神武其衆復立蚤升第三子南海王為主率兵拒戰齊神武擊滅之獲其偽主及其弟西海王并皇后夫人王公以下四百餘人歸於鄴居河西者多恃險不賓時方與齊神武爭衡未遑經畧太祖乃遣黃門郎楊忠就安撫之五年黑水部衆先叛七年別帥夏州刺史劉平伏又據上郡反自是北山諸部

連歲寇暴太祖前後遣李遠于謹侯莫陳崇李弼等相繼討平之武成初延州稽胡郝阿保郝狼皮率其種人附於齊氏阿保自署丞相狼皮自署柱國并與其別部劉桑德共為影響柱國豆盧寧督諸軍與延州刺史高琳擊破之二年狼皮等餘黨復叛詔大將軍韓杲討之俘斬甚衆保定中離石生胡數寇汾北勲州刺史韋孝寬於險要築城置兵糧以遏其路及楊忠與突厥伐齊稽胡等復懷旅拒不供糧餼忠乃詐其酋帥云與突厥

欲回兵討之酋帥等懼乃相率供饋焉語在忠傳其後
丹州綏州銀州等部內諸胡與蒲川別帥郝三郎等又
頻年逆命復詔達奚震辛威于實等前後窮討散其種
落天和二年延州總管宇文盛率衆城銀州稽胡白郁
久同喬是羅等欲邀襲盛軍盛竝討斬之又破其別帥
喬三勿同等五年開府劉雄出綏州巡檢北邊川路稽
胡帥喬白郎喬素勿同等渡河逆戰雄復破之建德五
年高祖敗齊師於晉州乘勝逐北齊人所棄甲仗未暇

收歛稽胡乘間竊出竝盜而有之乃立蠶升孫沒鐸為主號聖武皇帝年曰石平六年高祖定東夏將討之議欲窮其巢穴齊王憲以為種類既多又山谷阻絕王師一舉未可盡除且當剪其魁首餘加慰撫高祖然之乃以憲為行軍元帥督行軍總管趙王招譙王儉滕王迥等討之憲軍次馬邑乃分道俱進沒鐸遣其黨天柱守河東又遣其大帥穆支據河西規欲分守險要犄角憲軍憲命譙王儉攻天柱滕王迥擊穆支竝破之斬首萬

餘級趙王招又擒沒鐸餘衆盡降宣政元年汾州稽胡帥劉受羅千復反越王盛督諸軍討擒之自是寇盜頗息

庫莫奚鮮卑之別種也其先為慕容晃所破竄於松漠之間後種類漸多分為五部一曰辱紇主二曰莫賀弗三曰契箇四曰木昆五曰室得每部置俟斤一人有阿會氏者最為豪帥五部皆受其節度役屬於突厥而數與契丹相攻虜獲財畜因而行賞死者則以葦薄裹尸

懸之樹上大統五年遣使獻其方物

史臣曰凡民肖形天地稟靈陰陽愚智本於自然剛柔繫於水土故雨露所會風流所通九川為紀五嶽作鎮此之謂諸夏生其地者則仁義出焉昧谷嶠夷孤竹北戶限以丹徼紫塞隔以滄海交河此之謂荒裔感其氣者則凶德成焉若夫九夷八狄種落繁熾七戎六蠻克牝邊鄙雖風土殊俗嗜欲不同至於貪而無厭狼而好亂彊則旅拒弱則稽服其揆一也斯蓋天之所命使其

然乎

周書卷四十九

周書卷四十九考證

高麗傳土于紇斗骨城○魏書作紇升骨城

宕昌羗傳有梁勒者世為酋帥○勒魏書作憖

氏傳有氏帥楊駒始據仇池百頃○楊駒魏書作楊騰

周書卷四十九考證

欽定四庫全書

周書卷五十

唐 令 狐 德 棻 等 撰

列傳第四十二

異域下

突厥

吐谷渾

高昌

鄴善

焉耆

龜茲

于闐

嚙噠

粟特

安息

波斯

突厥者蓋匈奴之別種姓阿史那氏別為部落後為鄰國所破盡滅其族有一兒年且十歲兵人見其小不忍殺之乃刖其足棄草澤中有牝狼以肉飼之及長與狼合遂有孕焉彼王聞此兒尚在重遣殺之使者見狼在側并欲殺狼狼遂逃于高昌國之北山山有洞穴穴內有平壤茂草周回數百里四面俱山狼匿其中遂生十男十男長大外託妻孕其後各有一姓阿史那即一也子孫蕃育漸至數百家經數世相與出穴臣於茹茹居

金山之陽為茹茹鐵工金山形似兜鍪其俗謂兜鍪為突厥遂因以為號焉或云突厥之先出於索國在匈奴之北其部落大人曰阿謗步兄弟十七人其一曰伊質泥師都狼所生也謗步等性竝愚癡國遂被滅泥師都既別感異氣能徵召風雨娶二妻云是夏神冬神之女也一孕而生四男其一變為白鴻其一國於阿輔水劍水之間號為契骨其一國於處折水其一居踐斯處折施山即其大兒也山上仍有阿謗步種類並多寒露大

兒為出火溫養之咸得全濟遂共奉大兒為主號為突厥即訥都六設也訥都六有十妻所生子皆以母族為姓阿史那是其小妻之子也訥都六死十母子內欲擇立一人乃相率於大樹下共為約曰向樹跳躍能最高者即推立之阿史那子年幼而跳最高者諸子遂奉以為主號阿賢設此說雖殊然終狼種也其後曰土門部落稍盛始至塞上市繒絮願通中國大統十一年太祖遣酒泉胡安諾槃陀使焉其國皆相慶曰今大國使至

我國將興也十二年土門遂遣使獻方物時鐵勒將伐
茹茹土門率所部邀擊破之盡降其衆五萬餘落恃其
彊盛乃求婚於茹茹茹茹主阿那瓌大怒使人罵辱之
曰爾是我鍛奴何敢發是言也土門亦怒殺其使者遂
與之絕而求婚於我太祖許之十七年六月以魏長樂
公主妻之是歲魏文帝崩土門遣使來弔贈馬二百匹
魏廢帝元年正月土門發兵擊茹茹大破之於懷荒北
阿那瓌自殺其子菴羅辰奔齊餘衆復立阿那瓌叔父

鄧叔子為主土門遂自號伊利可汗猶古之單于也號其妻為可賀敦亦猶古之閼氏也土門死子科羅立科羅號乙息記可汗又破叔子於沃野北木賴山二年三月科羅遣使獻馬五萬匹科羅死弟侯斤立號木汗可汗侯斤一名燕都狀貌多奇異面廣尺餘其色甚赤眼若瑠璃性剛暴務於征伐乃率兵擊鄧叔子滅之叔子以其餘燼來奔侯斤又西破嚙噠東走契丹北并契骨威服塞外諸國其地東自遼海以西西至西海萬里南

自沙漠以北北至北海五六千里皆屬焉其俗被髮左衽穹廬氈帳隨水草遷徙以畜牧射獵為務賤老貴壯寡廉耻無禮義猶古之匈奴也其主初立近侍重臣等輿之以氈隨日轉九回每一回臣下皆拜拜訖乃扶令乘馬以帛絞其頸使纔不至絕然後釋而急問之曰你能作幾年可汗其主既神情瞋亂不能詳定多少臣下等隨其所言以驗修短之數大官有葉護次沒次特勒次俟利發次吐屯發及餘小官凡二十八等皆世為之

兵器有弓矢鳴鏑甲稍刀劍其佩飾則兼有伏突旗纛之上施金狼頭侍衛之士謂之附離夏言亦狼也蓋本狼生志不忘舊其徵發兵馬科稅雜畜輒刻木為數并一金鏃箭蠟封印之以為信契其刑法反叛殺人及姦人之婦盜馬絆者皆死姦人女者重責財物即以其女妻之鬪傷人者隨輕重輸物盜馬及雜物者各十餘倍徵之死者停屍於帳子孫及諸親屬男女各殺羊馬陳於帳前祭之繞帳走馬七匝一詣帳門以刀劈面且哭

血淚俱流如此者七度乃止擇日取亡者所乘馬及經服用之物并屍俱焚之收其餘灰待時而葬春夏死者候草木黃落秋冬死者候華葉榮茂然始坎而瘞之葬之日親屬設祭及走馬劈面如初死之儀葬訖於墓所立石建標其石多少依平生所殺人數又以祭之羊馬頭盡懸挂於標上是日也男女咸盛服飾會於葬所男有悅愛於女者歸即遣人娉問其父母多不違也父伯叔死者子弟及姪等妻其後母世叔母及嫂惟尊者不

得下淫雖移徙無常而各有地分可汗恒處於都斤山
牙帳東開蓋敬日之所出也每歲率諸貴人祭其先窟
又以五月中旬集他人水拜祭天神於都斤四五百里
有高山迥出上無草樹謂其為勃登凝黎夏言地神也
其書字類胡而不知年歷惟以草青為記俟斤部衆既
盛乃遣使請誅鄧叔子等太祖許之收叔子以下三千
人付其使者殺之於青門外三年俟斤襲擊吐谷渾破
之語在吐谷渾傳明帝二年俟斤遣使來獻方物保定

元年又三輩遣使貢其方物時與齊人交爭戎車歲動故每連結之以為外援初魏恭帝世侯斤許進女於太祖契未定而太祖崩尋而侯斤又以他女許高祖未及結納齊人亦遣求婚侯斤貪其幣厚將悔之至是詔遣涼州刺史楊荐武伯王慶等徃結之慶等至諭以信義侯斤遂絕齊使而定婚焉仍請舉國東伐語在荐等傳三年詔隋公楊忠率衆一萬與突厥伐齊忠軍度陁嶺侯斤率騎十萬來會明年正月攻齊主於晉陽不尅侯

斤遂縱兵大掠而還忠言於高祖曰突厥甲兵惡爵賞輕首領多而無法令何謂難制馭正由比者使人妄道其強盛欲令國家厚其使者身往重取其報朝廷受其虛言將士望風畏懼但虜態詐健而實易與耳今以臣觀之前後使人皆可斬也高祖不納是歲侯斤復遣使來獻更請東伐詔楊忠率兵出沃野晉公護趣洛陽以應之會護戰不利侯斤引還五年詔陳公純大司徒宇文貴神武公竇毅南安公楊荐等往逆女天和二年侯

斤又遣使來獻陳公純等至俟斤復貳於齊會有風雷
變乃許純等以后歸語在皇后傳四年俟斤又遣使獻
馬俟斤死弟他鉢可汗立自俟斤以來其國富強有凌
轢中夏志朝廷既與和親歲給繒絮錦綵十萬段突厥
在京師者又待以優禮衣錦食肉者常以千數齊人懼
其寇掠亦傾府藏以給之他鉢彌復驕傲至乃率其徒
屬曰但使我在南兩箇兒孝順何憂無物邪建德二年
他鉢遣使獻馬及齊滅齊定州刺史范陽王高紹義自

馬邑奔之他鉢立紹義為齊帝召集所部云為之復讐
宣政元年四月他鉢遂入寇幽州殺畧居民柱國劉雄
率兵拒戰兵敗死之高祖親總六軍將北伐會帝崩乃
班師是冬他鉢復寇邊圍酒泉大掠而去大象元年他
鉢復請和親帝冊趙王招女為千金公主以嫁之并遣
執紹義送闕他鉢不奉詔仍寇并州大象二年始遣使
奉獻且逆公主而紹義尚留不遣帝又令賀若誼往諭
之始送紹義云

吐谷渾本遼東鮮卑慕容廆之庶兄也初吐谷渾馬與廆馬鬪而廆馬傷廆遣讓之吐谷渾怒率其部落去之止於枹罕自為君長及孫葉延頗視書傳以古有王父字為氏遂以吐谷渾為氏焉自吐谷渾至伏連籌十四世伏連籌死子夸呂立始自號為可汗治伏俟城在青海西十五里雖有城郭而不居之恒處穹廬隨水草畜牧其地東西三千里南北千餘里官有王公僕射尚書及郎中將軍之號夸呂椎髻眊珠以皂為帽坐金師

子沐號其妻為恪尊衣織成裙披錦大袍辮髮於後首
戴金花其俗丈夫衣服畧同於華夏多以罽毼為冠亦
以繒為帽婦人皆貫珠束髮以多為貴兵器有弓刀甲
稍國無常賦須則稅富室商人以充用焉其刑罰殺人
及盜馬者死餘則徵物量事決杖刑人必以氈蒙頭持
石從高擊殺之父兄亡後妻後母及嫂等與突厥俗同
至於婚姻貧不能脩財物者輒盜女將去死者亦皆埋
殞其服制葬訖則除之性貪婪忍於殺害好射獵以肉

酪為糧亦知種田然其北界氣候多寒惟得蕪菁大麥
故其俗貧多富少青海周回千餘里海內有小山每冬
冰合後以良牝馬置此山至來冬收之馬皆有孕所生
得駒號為龍種必多駿異世傳青海驄者也土出犛牛
鳥多鸚鵡大統中夸呂再遣使獻馬及羊牛等然猶寇
抄不止緣邊多被其害魏廢帝二年太祖勒大兵至姑
臧夸呂震懼遣使貢方物是歲夸呂又通使於齊氏涼
州刺史史寧覘知其還率輕騎襲之於州西赤泉獲其

僕射乞伏觸板將軍翟潘密商胡二百四十人馳騾六
百頭雜綵絲絹以萬計魏恭帝二年史寧又與突厥朮
汗可汗襲擊夸呂破之虜其妻子大獲珍物及雜畜語
在史寧傳武成初夸呂復寇涼州刺史是云寶戰沒詔
賀蘭祥字文貴率兵討之夸呂遣其廣定王鍾留王拒
戰祥等破之廣定等遁走又攻拔其洮陽洪和二城置
洮州以還保定中夸呂前後三輩遣使獻方物天和初
其龍涸王莫昌率衆降以其地為扶州二年五月復遣

使來獻建德五年其國大亂高祖詔皇太子征之軍渡
青海至伏俟城夸呂遁走虜其餘衆而還明年又再遣
奉獻宣政初其趙王他婁屯來降自是朝獻遂絕

高昌者車師前王之故地東去長安四千九百里漢西
域長史及戊己校尉並治於此晉以其地為高昌郡張
軌呂光沮渠蒙遜據河西皆置太守以統之其後有關
爽及沮渠無諱並自署為太守無諱死茹茹殺其弟安
周以闕伯周為高昌王高昌之稱王自此始也伯周之

從子首歸為高車所滅次有張孟明馬儒相繼王之並
為國人所害乃更推立麴嘉為王嘉字靈鳳金城榆中
人本為儒右長史魏太和末立嘉死子豎立其地東西
三百里南北五百里國內總有城一十六官有令尹一
人比中夏相國次有公二人皆其王子也一為交河公
一為田地公次有左右衛次有八長史曰吏部祠部庫
部倉部主客禮部民部兵部等長史也次有建武威遠
陵江殿中伏波等將軍次有八司馬長史之副也次有

侍郎校書郎主簿從事階位相次分掌諸事次有省事
專掌導引其大事決之於王小事則世子及二公隨狀
斷決平章錄記事訖即除籍書之外無久掌文按官人
雖有列位並無曹府惟每旦集於牙門評議衆事諸城
各有戶曹水曹田曹每城遣司馬侍郎相監檢校名為
城令服飾丈夫從胡法婦人畧同華夏兵器有弓箭刀
楯甲稍文字亦同華夏無用胡書有毛詩論語孝經置
學官弟子以相教授雖習讀之而皆為胡語賦稅則計

輸銀錢無者輸麻布其刑法風俗婚姻喪葬與華夏小異而大同地多石磧氣候溫暖穀麥再熟宜蠶多五果有草曰羊刺其上生蜜焉自嘉以來世修藩臧於魏大統十四年詔以其世子玄喜為王恭帝二年又以其田地公茂嗣位武成元年其王遣使獻方物保定初又遣使來貢自燉煌向其國多沙磧道里不可准記惟以人畜骸骨及馳馬糞為驗又有魍魎怪異故商旅來往多取伊吾路云

鄯善古樓蘭國也東去長安五千里所治城方一里地
多沙鹵少水草北即白龍堆路魏太武時為沮渠安周
所攻其王西奔且末西北有流沙數百里夏日有熱風
為行旅之患風之欲至惟老駝知之即鳴而聚立埋其
口鼻於沙中人每以為候亦即將氈擁蔽鼻口其風迅
駛斯須過盡若不防者必至危斃大統八年其兄鄯米
率衆內附

焉耆國在白山之南七十里東去長安五千八百里其

王姓龍即前涼張軌所封龍熙之亂所治城方二里部
內凡有九城國小民貧無綱紀法令兵有弓刀甲稍婚
姻畧同華夏死亡者皆熱而後葬其服制滿七日則除
之丈夫並剪髮以為首飾文字與婆羅門同俗事天神
並崇信佛法尤重二月八日四月八日是日也其國咸
依釋教齋戒行道焉氣候寒土田良沃穀有稻粟菽麥
畜有駝馬牛羊養蠶不以為絲惟充綿纈俗尚蒲桃酒
兼愛音樂南去海十餘里有魚鹽蒲葦之饒保定四年

其王遣使獻名馬

龜茲國在白山之南一百七十里東去長安六千七百里其王姓白即後涼呂光所立白震之後所治城方五里其刑法殺人者死劫賊則斷其一臂并刖一足賊稅准地徵租無田者則稅銀錢婚姻喪葬風俗物產與焉支畧同惟氣候少溫為異又出細氈麋皮羶榆莢多鹽綠雌黃胡粉及良馬封牛等東有輪臺即漢貳師將軍李廣利所屠其南三百里有大水東流號計戍水即

黃河也保定元年其王遣使來獻

于闐國在葱嶺之北二百餘里東去長安七千七百里
所治城方八九里部內有大城五小城數十其刑法殺
人者死餘罪各隨輕重懲罰之自外風俗物產與龜茲
畧同俗重佛法寺塔僧尼甚衆王尤信向每設齋日必
親自洒掃饋食焉城南五十里有贊摩寺即昔羅漢比
丘比盧旃為其王造覆盆浮圖之所石上有辟支佛跌
處雙跡猶存自高昌以西諸國人等多深目高昌以東

此一國貌不甚胡頗類華夏城東二十里有大水北流
號樹枝水即黃河也城西十五里亦有大水名達利水
與樹枝俱北流同會於計戍建德三年其王遣使獻名
馬

噉噉國大月氏之種類在于闐之西東去長安一萬百
里其王治拔底延城蓋王舍城也其城方十餘里刑法
風俗與突厥畧同其俗又兄弟共娶一妻夫無兄弟者
其妻戴一角帽若有兄弟者依其多少之數更加帽角

焉其人凶悍能戰鬪于闐安息等大小二十餘國皆後
屬之大統十二年遣使獻其方物魏廢帝二年明帝二
年並遣使來獻後為突厥所破部落分散職貢遂絕
粟特國在葱嶺之西蓋古之庵蔡一名溫那沙治於大
澤在康居西北保定四年其王遣使獻方物

安息國在葱嶺之西治蔚搜城北與康居西與波斯相
接東去長安一萬七百里天和二年其王遣使來
獻

波斯國大月氏之別種治蘓利城古條支國也東去長安一萬五千三百里城方十餘里戶十餘萬王姓波斯氏坐金羊牀戴金花冠衣錦袍織成帔皆飾以珍珠寶物其俗丈夫剪髮戴白皮帽貫頭衫兩廂近下開之并有巾帔緣以織成婦女服大衫披大帔其髮前為髻後被之飾以金銀華仍貫五色珠絡之於膊王於其國內別有小牙十餘所猶中國之離宮也每年四月出遊處之十月乃還王即位以後擇諸子內賢者密書其名封

之於庫諸子及大臣皆莫之知也王死乃衆共發書視之其封內有名者即立以為王餘子各出就邊任兄弟更不相見也國人號王曰翳囀妃曰防步率王之諸子曰殺野大官有摸胡壇掌國內獄訟泥忽汗掌庫藏關禁地卑勃掌文書及衆務次有遏羅訶地掌王之內事薩波勃掌四方兵馬其下皆有屬官分統其事兵器有甲稍圓排劍弩弓箭戰並乘象每象百人隨之其刑法重罪懸諸竿上射而殺之次則繫獄新王立乃釋之輕

罪則劓剕若髡或翦半鬚及繫排於項上以為耻辱犯強盜者禁之終身姦貴人妻者男子流婦人割其耳鼻賦稅則准地輸銀錢俗事火祆神婚合亦不擇尊卑諸夷之中最為醜穢矣民女年十歲以上有姿貌者王收養之有功勲人即以分賜死者多棄屍於山一月治服城外有人別居惟知喪葬之事號為不淨人若入城市搖鈴自別以六月為歲首尤重七月七日十二月一日其日民庶以上各相命名設會作樂以極歡娛又以每

年正月二十日各祭其先死者氣候暑熱家自藏冰地
多沙磧引水溉灌其五穀及禽獸等與中夏畧同惟無
稻及黍稷土出名馬及駝富室至有數千頭者又出白
象師子大鳥卵珍珠離珠頗黎珊瑚琥珀瑠璃馬瑙水
晶瑟瑟金銀鍮石金剛火齊鑛鐵銅錫朱沙水銀綾錦
白疊氍毹氍毹赤罽皮及薰六鬱金蘓合青木等香
胡椒華搯石蜜千牛棗香附子訶梨勒無食子鹽綠雌
黃等物魏廢帝二年其王遣使來獻方物

史臣曰四夷之為中國患也久矣而北狄尤甚焉昔嚴
尤班固咸以周及秦漢未有得上策雖通賢之宏議
而史臣嘗以為疑夫步驟之來綿自今古澆淳之變無
隔華戎是以反道德棄仁義凌替之風歲廣至涇陽入
北地充斥之釁日深爰自金行逮乎水運戎夏離錯風
俗混并夷裔之情偽中國畢知之矣中國之得失夷裔
備聞之矣若乃不與約誓不就攻伐來而禦之去而守
之夫然則敵有餘力我無寧歲將士疲於奔命疆場苦

其交侵欲使偃伯靈臺歐世仁壽其可得乎是知秩宗之雅旨護軍之誠說實有會於當時而未允於後代也然則易稱見幾而作傳云相時而動夫時者得失之所繫幾者吉凶之所由况乎諸夏之朝治亂之運代有戎狄之地強弱之勢無恒若使臣畜之與羈縻和親之與征伐因其時而制變觀其幾而立權則舉無遺策謀多上算獸心之虜草面匪難沙幕之北雲撤何遠安有周秦漢魏優劣在其間哉

周書卷五十

周書卷五十考證

嚧達○魏書作嚧達

波斯國傳王姓波斯氏○魏書西域傳王姓波氏名斯

周書卷五十考證

編脩今授奉天錦州府知府臣文淳謹言北周
書五十卷本紀列傳四十二唐秘書丞令狐德
棻等撰當武德時棻建言近代無正史即詔與
諸臣論撰歷年不能成而罷貞觀二年復詔德
棻與岑文本崔仁師撰次周書陳叔達唐儉共
成之宋仁宗時出太清樓本合史館秘閣本又
募天下書而取夏竦李巽家本下館閣正其文
字其後王安國林希始上焉當周隋時柳蚪牛

弘各有撰述德棻等撰次不外柳牛兩家然其中頗有可議者蚪為周臣多諱周惡弘入隋代便文隋過在蚪與弘初無足怪德棻等身居異代而史不直書其失甚矣宇文氏建國倣周禮為六官府兵之制開唐一代良法而是書不為紀錄使後人無從參考識小遺大識者譏焉臣等奉

勅校勘南北監本字句錯訛悉為改正但宋版不可得

見文義可疑祇以北史參訂北史之文既與是
書不同未便補入故字有不同從其是者文之
遺脫祇加詳注不妄參入以附於闕文之義云
臣謹識

其交侵欲使偃伯靈臺歐世仁壽其可得乎是知秩宗之雅旨護軍之誠說實有會於當時而未允於後代也然則易稱見幾而作傳云相時而動夫時者得失之所繫幾者吉凶之所由况乎諸夏之朝治亂之運代有我狄之地強弱之勢無恒若使臣畜之與羈縻和親之與征伐因其時而制變觀其幾而立權則舉無遺策謀多上算獸心之虜草面匪難沙幕之北雲撤何遠安有周秦漢魏優劣在其間哉

周書卷五十

周書卷五十考證

嚧達○魏書作嚧達

波斯國傳王姓波斯氏○魏書西域傳王姓波氏名斯

周書卷五十考證

編脩今授奉天錦州府知府臣文淳謹言北周書五十卷本紀列傳四十二唐秘書丞令狐德棻等撰當武德時棻建言近代無正史即詔與諸臣論撰歷年不能成而罷貞觀二年復詔德棻與岑文本崔仁師撰次周書陳叔達唐儉共成之宋仁宗時出太清樓本合史館秘閣本又募天下書而取夏竦李巽家本下館閣正其文字其後王安國林希始上焉當周隋時柳蚪牛

弘各有撰述德棻等撰次不外柳牛兩家然其中頗有可議者蚪為周臣多諱周惡弘入隋代便文隋過在蚪與弘初無足怪德棻等身居異代而史不直書其失甚矣宇文氏建國倣周禮為六官府兵之制開唐一代良法而是書不為紀錄使後人無從參考識小遺大識者譏焉臣等奉

勅校勘南北監本字句錯訛悉為改正但宋版不可得

見文義可疑祇以北史參訂北史之文既與是
書不同未便補入故字有不同從其是者文之
遺脫祇加詳注不妄參入以附於闕文之義云
臣謹識

